

四庫全書

史部

欽定四庫全書

欽定盛京通志卷六十四

歷朝人物

明

欽定四庫全書

卷六十四

欽定四庫全書

欽定盛京通志卷六十四

歷朝人物

七

明

吳成遼陽人從成祖起兵設伏淝河進兵小河合
戰齊眉山靈璧皆殊死鬪功最多由都指揮僉事
擢都指揮使永樂初三從出塞有功洪熙元年進
左都督宣德初以成嘗宿衛東宮錄舊勞封清平

伯三年帝北征從敗賊於寬河進侯爵尋卒贈渠
國公諡壯勇

畢恭廣寧前屯衛人其先山東濟寧籍恭有文武
才正統間以巡撫王翱薦授百戶歷指揮僉事圖
上方畧開設迤西邊堡牆壕增置烽堠兵威大振
進署都指揮僉事守備寧前等衛在任五年邊鄙
寧謐進掌都司撫士卒草葦獎廣屯田興學校政
事平理軍民咸稱之所著有邊城吟稿

范廣遠東人正統中嗣世職為寧遠衛指揮僉事
積功進遼東都指揮僉事廣性剛果精騎射驍勇
絕倫每臨陣身先士卒英宗北狩廷議舉將材于
謙薦廣充左副總兵額森犯京師廣躍馬陷陣敗
之又敗之於紫荆關錄功進都督同知景泰初以
總兵官巡邊駐居庸還京副石亨提督團營軍馬
亨素銜之英宗復辟誣廣黨于謙下獄死成化初
廷臣訟其寃命子昇仍襲世職

額森蒙古語解見
名宦卷原作也先

令譯改

顧能定遼前衛人性剛直與人寡合天順元年進
士授戶部主事有清操生平不妄受人一錢天順
間監收通州糧盡革諸弊再往淮安收錢計一歲
所入九倍於昔尋陞本部員外郎成化初天下清
官四員能居都御史楊繼宗之次憲宗刻名於便
殿柱上惜不及大用云

耿賢定遼前衛人由指揮陞都指揮僉事掌都司

印備禦金復鐵鎖尋守備寧遠轉右叅將分守開
原善撫士卒不妄交際致仕歸所屬憫其清苦各
餽金幣賢悉分之軍士後卒葬城東杏林山與其
師顧能墓相近詩人弔之以為師弟雙清云

胡深定遠後衛人早孤育於伯父登天順八年進
士授監察御史剛正嫉邪不避權倖成化初與同
官鄭巳等爭慈懿太后山陵事彗星見復與同官
言大本未建異端太盛進退賞罰未公財用工役

未省賑濟無策備禦無方凡八事帝優詔答之又
上疏請斥奸邪痛詆大臣劾大學士商輅之失節
兵部尚書程信之剛暴禮部尚書姚夔之黷貨不
納深嘗巡按陝西諸大臣既被劾惡之坐以按陝
時杖殺人謫黥陽縣丞稍遷鬱林知州卒於官祀
鄉賢

賀欽字克恭其先浙江定海人以戍邊籍義州又
家廣寧少好學讀近思錄有悟成化二年登進士

授戶科給事中直言敢諫嘗書鄙夫章于壁以自警師事陳白沙先生獻章既歸肖其像事之弘治改元用閣臣薦起為陝西參議未至而母死乃上疏懇辭且陳四事一資真儒以講聖學二薦賢才以輔治道三遵祖制以處內官四興禮樂以化天下疏凡數萬言其云處內官者指王振曹吉祥汪直輩陷君誤國蠹政害民內不可使預大政外不可使掌兵權尤為切要奏入報聞正德四年太監

劉瑾括遼東田東人震恐義州守又貪橫民變聚
衆劫掠相戒曰毋驚賀黃門欽聞之急諭禍福以
身任之亂遂定欽學不務博涉靜思默識專讀四
書六經小學期于反身實踐謂為學不必求之高
遠在主敬以收放心而已每教人讀白鹿洞教條
嚴為已為人之辨隱居醫巫閭山下讀書之暇釣
游凌溪徜徉自得有醫巫閭集行世別號醫閭沒
後鄉士大夫為之立祠於釣臺

陳壽字本仁其先新淦人祖志弘代兄戍遼東遂籍寧遠衛壽少貧甚得遺金坐至夜分還其主從鄉人賀欽學登成化八年進士授戶科給事中言時政無隱彈劾不避權貴弘治十三年以右僉都御史巡撫延綏敵兵入掠擊却之未幾何碩托羅率衆大至壽自出帳擁數十騎據烏皮几指揮敵疑之遂引去既而授諸路將領方畧邀擊之皆克捷軍聲大振尋遷右副都御史掌南院正德初劉

瑾矯詔逮南京科道戴銑等壽抗章論救瑾怒罷
其官九年復起巡撫陝西盜賊屏息廉名尤著夏
大旱戒刑清獄齋心誠禱天乃雨歲大熟尋拜南
京兵部侍郎陝人呼號擁輿移日不得行進刑部
尚書致仕卒年八十三壽清廉歷官四十年無家
可歸寓南都所居不蔽風雨其卒也尚書李充嗣

府尹寇天敘為之殮

和碩國語解見闕郵卷蒙古語解見黑龍江山川卷原作

火節托囉國語解見黑龍江山川卷原作脫羅今譯改

潘輔廣寧人弘治六年進士授順天永清縣尹有
冰蘖聲時盜賊竊發境江緝捕有方畏威遠遁民
皆安堵後卒於官

孫磐定遠右衛人少有氣節登弘治九年進士初
觀政即上疏言近日諫官以言為諱請定建言者
為四等最上不避禍患抗彈權貴者其次揚清激
濁能補闕拾遺又其次建白時政有裨軍國皆分
別擢叙而粉飾文具循默不言者則罷黜之庶言

官知警不至曠瘵時不見用尋擢吏部主事正德
元年官官漸用事磐復上疏言今日弊政莫甚於
內臣典兵乞盡撤各鎮中官還京專以邊務責將帥
不從時劉瑾得志深嫉之斥磐為奸黨遂免官瑾
誅復起河南按察司僉事值流賊猖獗資給軍餉
鎧仗以至保障留都遏賊東殄磐之籌畫居多

王春廣寧左屯衛人弘治九年進士授翰林院檢討
陞周府長史時宗室以巡撫勾稽廩祿聚衆往

課於門後因治兵備大盜宗室疑之皆挾兵自衛
春啟王徧諭其故且止巡撫兵衆乃安有復菴詩
集行世

崔招遼陽人弘治十二年進士正德初知威州以
德服遠邊陲無警後改任澤州撤淫祠廣儲蓄善
獎進後學課試皆有程期

張經字天敘瀋陽中衛人正德六年進士授新樂
縣知縣擢監察御史按宣府劾鎮守太監丁喜貪

肆罪嗣為喜所訐逮繫詔獄都御史彭澤及兩京
監官論辨其誣謫河南河內縣典史憂忿卒於途
妻子扶柩歸葬嘉靖改元追贈光祿少卿

范鏊字平甫其先江西樂平人遷瀋陽舉正德十
二年進士授工部主事擢員外郎嘉靖三年伏闕
爭大禮下獄廷杖遷河南知府歲大饑巡撫潘墳
駁諸請賑文牒候勘實乃發鏊不待報輒開倉賑
之全活十餘萬人歷遷右副都御史巡撫寧夏鏊

為人持重有方畧既莅鎮不尚首功一意練步騎
廣儲蓄善治關隘亭障寇為逖徙居數年引疾歸
起故官撫河南尋召為兵部右侍郎奉詔總理邊
關阮隘奏上經畧朔河川居庸關諸處事宜帝才
總甚即命為兵部尚書總以老辭帝怒削其籍時
嚴嵩當國而總本由徐階薦天下推為長者惜其
去不以罪久之乃卒隆慶元年復官總為官剛斷
明察其巡撫寧夏時清查侵盜糧草裁革冒功陞

賞弛廢振興邊境肅然

傅鑰字希準廣寧人正德六年進士授給事中嘗
論邊事為尚書王瓊嘆服會宣大將領失利亡卒
甚多廷議遣鑰覆視上曰是嘗言邊事者稱是選
矣鑰至鎮考治甄別不隨不苛得實以報嘉靖間
累陞山西按察使用法平恕兼得大體富民某殺
人當死以貨免鑰收鞠之寘於法知縣某主簿某
皆良吏為姦人所構事下按察司或謂鑰云是當

道所欲入也鑰曰法如此可枉徇乎竟白之終河
南巡撫

徐景嵩定遼中衛人正德九年進士尹咸寧陞戶
科給事中彈劾不避權貴歷河間知府山西按察
副使

趙國忠字伯進錦州衛人嗣指揮職嘉靖初舉武
會試進都指揮僉事擢錦義右參將連破敵進署
都督僉事為遼東總兵官有功進都督同知嗣代

趙卿鎮宣府命部將逆擊諳達於大濇沱敗之寇
盡走及諳達薄京師國忠趨入衛移護諸陵寇見
國忠陣於紅門畏不敢入三十一年再鎮遼東禦
却小王子數萬騎明年逐敵出塞多斬獲進秩一
等國忠善戰射穿札為將有威嚴歷兩鎮繕亭障

練士馬邊防賴之

諳達國語解見吉林山
川卷原作僣答今譯改

李景登廣寧人神宗二十年進士任猗氏縣才敏
氣恬不以崖岸自異請除荒地課贍書生陞吏部

主事出知漢中府冰操嚴潔明敏果斷蒞任三年
案無留牘獄無沉滯

終卜年遼陽人神宗四十四年進士知河間縣節
用愛人除門則俵馬大戶三害境內獲安邑人立
祠祀之事見畿輔通志

祖寬遼東人少從軍有功累官寧遠叅將勇敢善
戰部卒多塞外降人所向克捷崇禎五年叛將李
九成圍萊州詔發關外兵討之寬為前鋒率五百

騎遇賊兵三千於沙河寬殊死戰賊退走解萊州
圍進都督僉事八年為總兵官討流賊挫張獻忠
於焦村復遇汝州賊寬率軍至大敗之十一年

王師下山東濟南失守時誣寬以失陷藩封被逮棄市
寬敵戰有功稱良將性剛使氣不為文吏所喜卒
罹大辟莫為救論人頗謂失刑云

欽定盛京通志卷六十四

欽定四庫全書

史部

欽定盛京通志卷六十五

六

少詹事_臣曹城覆勘

總校官編修_臣朱鈴

欽定四庫全書

欽定盛京通志卷六十五

國朝人物一

宗室諸王

欽定四庫全書

欽定盛京通志卷六十五

國朝人物一

宗室諸王

武功郡王禮敦

景祖翼皇帝第一子也初

肇祖原皇帝於蘓克素護河部之呼蘭哈達擒斬讐人開

基赫圖阿拉地三傳

興祖直皇帝有子六分築六城環衛而居並稱寧古塔貝勒第四子為

景祖翼皇帝居赫圖阿拉城禮敦為

顯祖宣皇帝之兄生而英勇當六城並建時近地部落中有額色納者生九子俱强悍又有嘉瑚者生七子俱輕捷多力嘗身披重鎧連躍九牛二族恃其強侵陵諸路禮敦從

景祖率諸貝勒往征盡滅之收服五嶺東蘓克素護河西

二百里內諸部由此國益強盛以禮敦戰功居最
號曰巴圖魯其後諸族人或嗜利召外侮或構兵
釀內憂

太祖高皇帝備嘗艱險討誅尼堪外蘭乃得國中帖服而
禮敦時已早沒追溯翼運功宗莫出其右子貝和
齊克承先志敬事

太祖

太祖建都遼陽後進征廣寧

命貝和齊與宗室鐸弼等統兵留守遼陽嗣命貝和齊等

奉移

祖陵於東京城之陽魯山禮敦祔葬

陵旁

太祖文皇帝天聰時以貝和齊長子色勒為正藍旗都統

崇德元年四月追封禮敦為武功郡王配饗

太廟

世祖章皇帝順治四年七月錄武功郡王孫席賚等均授

佐領以色勒有軍功所得騎都尉晉一等男十五年九月敬移東京

祖陵於

興京奉安

永陵禮敦亦遷祔

永陵旁

聖祖仁皇帝康熙二十一年三十七年

親詣

興京恭謁

永陵

命大臣詣武功郡王墓酌酒五十六年八月

念武功郡王後裔未有顯秩

特擢其第三世孫侍衛吉禮為散秩大臣並

命予世襲乾隆十九年九月

皇上駕詣

盛京

詔以盛京為龍興重地國初諸王功烈懋著宜建祠以
酬舊勲而示來許命曰賢王祠春秋致祭以武功郡

王入祠

原奉
載

諭旨恭
綸音門

四十三年正月復奉

諭旨

命史臣立傳以徵信詳慧哲郡王傳先是乾隆八年十
九年迨四十三年四十八年

上謂

永陵皆

命大臣酌酒於墓

慧哲郡王額爾袞

景祖翼皇帝第二子

顯祖宣皇帝之兄當

太祖高皇帝未誅尼堪外蘭時覺爾察城阿哈和洛城和

洛噶善城尼瑪蘭城章嘉城五城諸族人或嗜利

構兵額爾袞則智慮周達視不善若浼己故得永

保令名云卒後無嗣

世祖章皇帝順治十年五月追封多羅郡王諡曰慧哲十一年三月配饗

太廟與武功郡王禮敦宣獻郡王齋堪通達郡王雅爾哈齊並列東廡乾隆十九年九月入祀

盛京賢王祠四十三年正月

上諭國史館諸臣曰通達郡王係

顯祖之子武功慧哲宣獻三郡王係

景祖之子當時雖身預配饗第以宗支而論已在覺羅之

列是以宗室王公表傳內未經入傳但思宗室傳既限於支派國史傳又以屬在宗潢今此四王無所附麗亦覺欠缺著交國史館查明四王事實補為立傳列於國史諸大臣傳之前即或當時紀載簡少其功績無由稽核無妨不拘詳畧各立一傳以徵信焉

宣獻郡王齋堪

景祖翼皇帝三子

顯祖宣皇帝之兄當

太祖高皇帝未誅尼堪外蘭時族人嗜利搆兵者齋堪弗與為伍惟善是務著望老成卒後無嗣

世祖章皇帝順治十年五月追封齋堪多羅郡王諡曰宣獻十一年三月配饗

太廟與武功郡王禮敦慧哲郡王額爾袞通達郡王雅爾哈齊並列東廡乾隆十九年九月入祀

盛京賢王祠四十三年正月

命史臣立傳以徵信互詳武功郡王慧哲郡王傳

通達郡王雅爾哈齊

顯祖宣皇帝第四子與

太祖高皇帝及追封親王舒爾哈齊俱為

宣皇后所生舒爾哈齊事蹟見其子鄭親王濟爾哈朗傳
雅爾哈齊無嗣其卒年及事蹟舊史不著

世祖章皇帝順治十年五月追封多羅郡王諡曰通達十
一年三月配饗

太廟與武功郡王禮敦慧哲郡王額爾袞宣獻郡王齊堪

並列東廡乾隆十九年九月入祀

盛京賢王祠詳武功郡王傳四十三年正月

命史臣立傳以徵信詳慧哲郡王傳

禮親王代善

太祖高皇帝第二子也賦性忠果英勇過人從征哈達輝
發葉赫等國論功授貝勒瓦爾喀費優城人苦烏
拉國布占泰之虐乞移家歸附丁未歲

太祖命與貝勒舒爾哈齊褚英等率兵往徙之乘夜陰晦

行見大纛之上有光衆以為異取視無有復樹之
光如初舒爾哈齊疑之欲回兵代善曰或吉或凶
兆已定吾等何所見而遽還耶遂決意進兵盡收
環城屯寨五百戶令侍衛扈爾漢護之先行布占
泰邀諸路不得進次日諸貝勒至代善及褚英各
率兵五百分路夾擊大敗之代善從馬上攫貝勒
博克多胄而斬之並斬其子生擒貝勒瑚哩佈及
常住父子時天大雪敵敗走僵仆斬獲無算

太祖嘉其功

賜名古英巴圖魯癸丑年正月

太祖征布占泰代善從時烏拉三萬人越富爾哈城而軍

太祖猶未欲加兵將遣使申諭代善進曰我士飽馬騰利在速戰所慮者布占泰不出耳今彼兵既出平原曠野可一鼓擒也舍此不戰厲兵秣馬將何為耶

太祖曰我用兵以來無不身先搏戰但恐貝勒諸大臣或

致有一二被傷實深惜之爾衆志既孚即可決戰因
命進兵代善隨

太祖親突陣大敗其兵遂克其城布占泰遁走僅以身免

天命元年

太祖即帝位授大貝勒四人以代善為首三年四月從

太祖伐明會天雨欲還軍代善曰因明不道是以興師既

臨其境若遽還師將復修和好乎抑相仇怨乎軍
行遠地誰能諱之天雖陰雨吾軍皆有禦雨之具

且天降此雨以懈明邊將之心是雨利於我不利於彼也

太祖善其言遂進兵下撫順等城及堡寨五百餘處大軍已出關明廣寧總兵張承廕等來追時

太宗為四貝勒與代善率兵迎擊之盡殲其衆四年正月命往守扎喀關二月命大發兵四路來侵

太祖率師親征代善先行遂過扎喀關集兵以待

太宗以祀事後至謂界藩山築城夫役宜急防衛代善遂

同督兵赴界藩山斬敵衆百人復敗明總兵杜松等於薩爾滸山又明總兵馬林營尚間崖潘宗顏營斐芬山互為犄角

太祖命步兵接戰方傳諭敵兵自西突至代善呼曰兵已進矣即怒馬迎戰直入其陣遂敗敵兵明總兵劉綎由寬甸路來侵

太宗督兵登岡從上衝擊代善率左翼兵自西夾攻之敵衆披靡劉綎等沒于陣八月從伐葉赫代善諭降

其西城葉赫平六年三月大軍取明瀋陽明總兵
李秉誠以兵來援

太宗擊破之代善及貝勒岳託共逐四十里斬馘甚衆十
一年八月

太祖上賓代善在諸子最長而我

太宗功德隆茂衆望尤屬代善遂與子岳託薩哈璘等作
議書言紹承大統必得聖君始能戡亂致治以成
一統自顧德薄願共推戴

四貝勒嗣位入朝遍示諸貝勒大臣等衆皆喜

太宗辭讓再三代善言益懇切衆議亦堅

太宗乃從之天總元年五月率兵攻明錦州圍其城三年

十一月從

太宗伐明逼燕京敗明應援總兵滿桂等兵殲戮甚衆五

年八月我師圍明大凌河城明兵來援敗之生擒

監軍張春等春不屈

太宗怒欲誅之代善進曰我前此所獲無不收養且此人

既以死忠為貴奈何殺之以遂其志乎

太宗悅遂赦春崇德元年四月大封功臣晉代善為和碩兄禮親王十二月從

太宗征朝鮮受其降以歸三年二月

太宗征喀爾喀同鄭親王濟爾哈朗等留守並監築遼陽都爾弼城八年八月

太宗上賓

世祖章皇帝嗣位郡王阿達禮及貝子碩託謀立睿親王

多爾袞代善發其謀俱伏誅碩託為代善第二子
阿達禮則其孫也順治元年朝元旦

世祖命上殿毋拜以優異之五年十月薨子滿達海襲是
年新定諸王葬費親王例給銀五千

世祖以代善功德懋著

特賜萬兩立碑紀功康熙十年五月追諡曰烈復立碑以
表於墓乾隆四十三年正月

上諭廷臣以禮親王誠心推戴勤勞王室懋著壯猷克

昭駿烈其後改封為康親王親賢世胄竟改初封嘉
號何以垂詒奕禩示酬庸追本之義宜仍復原稱封
號並配享

太廟

原奉
載

諭音恭
綸音門

代善子岳託薩哈璘瓦克達滿達

海瑪瞻俱著勲名各有傳

鄭親王濟爾哈朗舒爾哈齊第六子也舒爾哈齊

顯祖宣皇帝第三子初授貝勒以收瓦爾喀部敗烏拉之

衆積功

賜號達爾漢巴圖魯辛亥年八月薨順治十年五月追封

和碩親王諡曰莊濟爾哈朗幼育於

太祖宮中號和碩貝勒天命十一年正月從代善征蒙古

五部有功天聰元年四月同貝勒岳託等伐朝鮮

及明皮島帥毛文龍大軍薄義州克之遂拔城

安州定州搗毛文龍所居鐵山直逼朝鮮平壤城

朝鮮遣使來請和議未決阿敏有異志欲屯種以

居因令直趨王京岳託與濟爾哈朗議濟爾哈朗

曰兵不可深入聞去此三十里有平山城者可駐
兵以待和議之成遂引軍駐平山朝鮮王李侖遣
使至議歲貢許之遂定盟振旅歸五月從

太宗伐明攻寧遠城與明總兵滿桂兵遇力戰被創氣彌
奮大敗其衆二年五月討蒙古固特搭布囊斬之
收其部三年九月同岳託等率兵往畧明錦州寧
遠焚其積聚而還十月

太宗親統大軍伐明

命同岳託攻大安口毀其水門乘夜進城明馬蘭營叅將率兵來援我前鋒軍擊走之比明見明援兵立營山上濟爾哈朗先縱兵往敗其衆追至馬蘭營既而岳託復敗遵化州援兵自辰迄巳五戰皆捷馬蘭等三營俱下引兵趨石門殲明援兵於道十二月同貝勒阿巴泰等率兵往通州焚其船遂攻張家灣克之四年正月誅叛將劉興祚于山海關并擒其弟興賢以獻以兵駐永平招降灤州遷安等

處三月以貝勒阿敏代之還五年七月初設六部
命理刑部事八月從攻大凌河率本旗兵為後應與代善
等克臺堡守之十一月截塔山以東邊海隘口有
俘獲七年三月

命築岫巖城以兵駐守五月與杜度等往迎明降將孔有德耿仲明於江上獲明及朝鮮降人以歸八年五月

太宗征察哈爾留守

盛京十年四月改元崇德晉封和碩鄭親王十二月
太宗征朝鮮復留守三年十月大軍伐明以本旗兵自前
屯衛會大兵於中後所克模龍關及五里堡屯臺
四年五月往畧明錦州松山與明兵遇九戰九敗
之俘獲甚衆六年三月同阿濟格多鐸等克錦州

捷聞

太宗大悅令八門擊鼓召衆於篤恭殿宣捷五月又敗明
經畧洪承疇兵六萬於松山北岡八月洪承疇等

率兵十三萬來援錦州

太宗親統大軍征之

命留守九月復從圍錦州十二月承疇以兵六千夜犯正
紅正黃兩旗營濟爾哈朗令軍各依汛地沿濠射
之敵敗去會松山城門閉不得入盡降其衆錦州
被圍一年糧盡援絕會洪承疇被擒祖大壽乃以
城降遂議取寧遠之策四月同多爾袞等率兵攻
塔山克之進攻杏山城中懼開門降七年七月

賜鞍馬一蟒緞百八年八月

世祖章皇帝嗣位以濟爾哈朗與多爾袞輔理國政九月
率兵攻寧遠拔其城並克前屯衛斬總兵李輔明
等乘勝取中前所順治元年十月晉封信義輔政
叔王

賜金千兩銀萬兩緞千疋五年三月貝子屯齊等訐告兩
旗大臣謀立豪格濟爾哈朗知而不舉議罪降多
羅郡王閏四月復爵九月

命為定遠大將軍討湖廣流賊李錦等道出山東勦平曹
縣土寇六年八月祇長沙敗賊於湘潭收復府州
縣六十餘城擒斬偽王以下文武官以百計湖南
貴州悉平七年正月振旅還四月

賜金二百兩銀二萬兩嗣以與多爾袞不合罷輔政九年
二月晉封叔和碩鄭親王十二年二月上疏言政
事大畧言無蔽言路無弛武備恤滿洲官兵疾苦
立史官起居注

世祖嘉其言五月病劇

車駕臨問問有遺言乎泣對曰臣受

三朝深恩未能仰荅不勝感痛惟願以取雲貴滅朱由榔

統一四海為念且滿洲甚少而能破流寇取京都

者應加撫恤

世祖垂涕曰天何故不令朕叔長年耶言已大慟

詔畫工往圖其像留宮中及薨輟朝七日

賜祭葬所給銀兩視定例倍之十四年立碑紀功稱忠冠

當時功昭後世云康熙十年六月追諡曰獻乾隆四十三年

上諭廷臣以鄭親王後改封簡親王親藩世胄改易原封不足以昭彰闡宗勛襲慶承家之至意著仍稱原封號並配享

太廟子濟度於順治十一年二月授定遠大將軍以平海寇鄭成功有功襲封親王後薨諡曰純

饒餘親王阿巴泰

太祖高皇帝第七子也初以戰功封台吉辛亥年秋七月
與費英東等率兵征東海窩集部克其二路天命
四年六月隨伐明克撫順八年四月

太祖命與諸台吉往討喀爾喀扎魯特部昂安以其執我
使送葉赫故昂安傷我前鋒統領岱穆布阿巴泰
大怒陣斬昂安父子並從者俘其孥以還以功晉
封貝勒天聰元年五月

太宗伐明與貝勒杜度居守二年五月

命與岳託等率兵墮明錦州城三年十月

太宗親統師伐明次老河

命與貝勒阿濟格率兵攻龍井關克之又擊斬明三屯營
哨卒抵漢兒莊會貝勒多爾袞等降明守將李豐
等十二月與濟爾哈朗等率兵略通州焚其船攻
張家灣克之復與大貝勒代善等率護軍往畧薊
州破山海關援兵五千餘人四年正月克永平與
濟爾哈朗鎮守永平三月同薩哈璘援灤州明兵

退乃還是年初設六部

命理工部事七年六月

詔問貝勒大臣用兵宜先伐何國阿巴泰言宜選精兵襲
明邊牆則關門可得大軍屯於邊外擇諸貝勒將
兵分路馳入若獲可用之人送至大寨俾遣入內
地則消息愈通錦州無足過慮我兵既入是天時
已至今祖大壽入山海關便可與我兵相會合也
八月同薩哈璘豪格等畧明山海關俘獲無算崇

德元年四月叙功封為饒餘貝勒六月伐明分兵
三路入會於延慶州九月畧保定至安州凡克十
二城敗明兵五十六陣凱旋

太宗親往迎之十二月

太宗親征朝鮮

命駐防噶海城三年二月

太宗親征喀爾喀令留守

盛京併監築遼陽等城五月修治

盛京至遼河大路與多爾袞董其役九月伐明自董
家口入守將棄城遁四年四月師還

賜馬二匹銀五千兩九月畧明錦州寧遠五年六月與多

爾袞等於義州築城屯田七月川錦州城西禾敗
錦州兵與杜度截明運糧兵獲其米千石牲畜百
餘而還十二月同多爾袞豪格杜度率兵往代濟
爾哈朗等圍錦州六年六月擊敗關內援兵於松
山七年三月同濟爾哈朗等攻杏山以礮擊墮其

城降之十月

特授奉命大將軍率師伐明直抵兗州府俘魯王朱以派
下樂陵等處自濟以東州縣望風降附八年六月

班師

賜銀萬兩是月又令與諸貝勒分道伐明會師延慶州順

治元年四月

世祖念開國宗勛晉封多羅饒餘郡王二年正月

命為總統率官兵代豪格勒土賊於山東二月遣準塔等

擊賊於徐州賊衆奔潰赴河死者無算三年三月
薨謚曰敏尋以子岳樂晉封親王贈如其爵岳樂
平江西取湖南勦滅逆藩吳三桂有懋功詳

國史傳

欽定盛京通志卷六十五

欽定四庫全書

欽定盛京通志卷六十六

國朝人物 二

宗室諸王

欽定四庫全書

欽定盛京通志卷六十六

國朝人物 二

宗室親王

睿親王多爾袞

太祖高皇帝第十四子也生而聰慧多智謀畧絕人天聰二年三月與弟多鐸從

太宗征察哈爾大捷振旅還瀋陽於途中大宴羣臣以多

爾袞初從征即有功喜甚

特賜號墨爾根岱青貝勒三年九月從伐明逼燕京擊敗

明袁崇煥祖大壽援兵二萬五年八月隨

太宗攻克大凌河是年初設六部

命掌吏部事六年五月畧明歸化城黃河一帶降其民七

年六月多爾袞陳伐明之策曰宜乘春時整士卒

待我耕種既畢彼穀將熟入邊直逼燕京截其援

兵殘燬屯堡因糧於敵為久駐計可坐而待其斃

也八年五月從

太宗伐明分道入邊畧朔州至五臺山而還九年六月獻
伐明所獲山西俘並所收察哈爾全部崇德元年
四月以功封和碩睿親王八月伐明率右翼兵由
錦州入十二月從征朝鮮別從容甸路取昌州敗
敵衆克江華島三年二月監築遼陽都爾弼城七
月更定各衙門官制十月授奉命大將軍與岳託
分道伐明分兵八道長驅北京迤西千里將卒皆

潰畧地至山西界復東趨臨清破濟南克城四十餘十七戰皆捷

賜馬五匹銀二萬兩六年六月代濟爾哈朗圍錦州敗其援兵八月明經畧洪承疇以兵十三萬來援軍容甚盛

太宗聞之親統大軍渡遼河疾馳六日至七家堡多爾袞請進軍駐松杏之間

太宗從之明松山諸將見黃幄羽葆軍逼山而營大懼謀

夜遁多爾袞率兵趨塔山大路橫擊之潰兵沿山
至海死者相枕藉明總兵吳三桂等單騎奔入杏
山乃率兵還七年三月復與濟爾哈朗圍錦州明
總兵祖大壽力竭以城降四月又破塔山杏山關
門以東盡入版圖八年八月

世祖章皇帝即位代善等集諸貝勒大臣議以多爾袞與
濟爾哈朗同輔政先是阿達禮等謀立多爾袞多
爾袞與代善發其謀誅之順治元年四月將大舉

南征

世祖御篤恭殿

賜多爾袞大將軍勅印加殊禮錫以

御用纛蓋時流賊李自成已破燕京明山海關總兵吳三

桂遣其將郭雲龍等致書請兵多爾袞以書報之

曰我國向欲與明修好屢為致書明之君臣不計

國家喪亂軍民塗炭曾無一言相答是以整師三

入蓋示意於明欲其君臣勢屈而通好也若今日

則不復出此惟有底定中原與民休息而已今聞
崇禎帝滅於流賊不勝髮指用率仁義之師沈舟
破釜誓不返旌期必滅賊出民水火伯遣使致書
深為喜悅夫伯思報主恩與流賊不共戴天誠忠
臣之義也伯雖向守遼東與我為敵今勿因前故
尚復懷疑昔管仲射桓公中鉤桓公用為仲父以
成霸業伯若率衆來歸必封以故土晉為藩王國
讐可報身家可保世世子孫長享富貴當如河山

之永也師次連山三桂復請速進兵多爾袞得書
率兵夜馳踰寧遠次沙河距山海關十里三桂報
賊已出邊立寨柵多爾袞隨命諸王等率精兵迎
擊之敗賊將唐通於一片石師至山海關三桂開
關親出迎多爾袞謂三桂曰爾歸營令爾兵繫白
布為識恐與賊混致誤殺也使之先驅遂入關時
李自成所率賊二十餘萬皆久歷戰陣殊剽悍恃
其衆陣於關內自北山亘海我兵少對賊布陣不

能橫及海岸多爾袞集諸王貝勒大臣謂曰流賊
橫行久獷且衆不可輕擊也吾觀其陣大相去遠
首尾不能顧可鱗次集我兵對賊陣尾伺其氣衰
突擊之必勝努力破此則大業成矣勿越伍躁進
違節制陣既列令三桂居右翼之末先悉其衆搏
戰賊力鬪圍開復合戰良久我兵從三桂陣右突
出衝賊中堅萬馬騰躍飛矢雨墮天大風沙石飛
走擊賊如電自成方登高岡觀戰知為我兵膽俱

落急策馬下岡走我兵無不一當百追奔四十里
賊衆大潰自相踐踏僵尸遍野溝水盡赤自成奔
還京師乃以馬步兵一萬隸三桂追賊向北京多
爾袞與諸將誓曰此行志在滅賊救民以安天下
勿殺無辜掠財物焚廬舍不如約者罪五月整兵
入燕京以帝禮葬崇禎帝發喪三日遣武英郡王
阿濟格等分道追自成連破之自成走西安燕京
附近各城俱納款畿輔肅清山東山西以次悉定

乃定議迎

世祖都燕京時明南京諸臣擁立福王朱由崧稱帝號其大學士史可法督師揚州多爾袞欲招之使降令南來副將韓拱薇等賫書致可法曰予向在瀋陽即知燕京物望咸推司馬後入關破賊得與都人士相接識介弟於清班曾託其手勒平安拳致衷緒未審以何時得達比聞道路紛紛多謂金陵有自立者夫君父之讐不共戴天春秋之義有賊未

討則故君不得書葬新君不得書即位所以防亂
臣賊子法至嚴也闖賊李自成稱兵犯闕手毒君
親中國臣民不聞加遺一矢平西王吳三桂介在
東陲獨效包胥之哭

朝廷感其忠義念累世之宿好棄近日之小嫌爰整貌
貅驅除狗鼠入京之日首崇懷宗帝后謚號卜葬
山陵悉如典禮親郡王將軍以下一仍故封不加
改削勲戚文武諸臣咸在朝列恩禮有加耕市不

驚秋毫無擾方擬秋高氣爽遣將西征傳檄江南
聯兵河朔陳師鞠旅戮力同心報乃君國之仇彰
我

朝廷之德豈意南州諸君子苟安旦夕弗審事機聊慕
虛名頓忘實害予甚惑之國家之撫定燕都乃得
之於闖賊非取之於明朝也賊毀明朝之廟主辱
及先人我國家不憚征繕之勞悉索敝賦代為雪
恥孝子仁人當如何感恩圖報茲乃乘逆寇稽誅

王師暫息遂欲雄據江南坐享漁人之利揆諸情理豈可謂平將以為天塹不能飛渡投鞭不足斷流耶夫閩賊但為明朝祟耳未嘗得罪於我國家也徒以薄海同仇特伸大義今若擁號稱尊便是天有二日儼為勍敵予將簡西行之銳轉旆東征且擬釋彼重誅命為前導夫以中華全力受制潢池而欲以江左一隅兼支大國勝負之數無待蓍龜矣予聞君子之愛人也以德細人則以姑息諸

君子果識時知命篤念故主厚愛賢王宜勸令削
號歸藩永綏福祿

朝廷當待以虞賓統承禮物帶礪山河位在諸王侯上
庶不負

朝廷伸義討賊興滅繼絕之初心至南州羣彥翩然來
儀則爾公爾侯列爵分土有平西之典例在惟執
事實圖利之輓近士大夫好高樹名義而不顧國
家之急每有大事輒同築舍昔宋人議論未定兵

已渡河可為殷鑒先生領袖名流主持至計必能
深惟終始寧忍隨俗浮沈取舍從違應早審定兵
行在即可西可東南國安危在此一舉願諸君子
同以討賊為心毋貪一身瞬息之榮而重故國無
窮之禍為亂臣賊子所笑予實有厚望焉記有之
惟善人能受盡言敬布腹心佇聞明教江天在望
延跂為勞書不宣意可法遣人報書曰南中向接
好音法隨遣使問訊吳大將軍未敢遽通左右非

委隆誼於草莽也誠以大夫無私交春秋之義今
倥偬之際忽捧琬琰之章真不啻從天而降也循
讀再三殷殷致意若以逆賊尚稽天討煩貴國憂
法且感且泣敬為貴國一詳陳之我大行皇帝敬
天法祖勤政愛民真堯舜之主也以庸臣誤國致
有三月十九日之事法待罪南樞救援無及師次
淮上凶問遂來地坼天崩山枯海泣嗟乎人孰無
君雖肆法于市朝以為泄泄者之戒亦奚足謝先

皇帝于地下哉爾時南中臣民哀痛如喪考妣無
不拊膺切齒欲悉東南之甲立翦兇仇而二三老
臣謂國破君亡宗社為重相與迎立今上以繫中
外之心今上非他神宗之孫先宗猶子而大行皇
帝之兄也名正言順天與人歸五月朔日駕臨南
都萬姓夾道歡呼聲聞數里羣臣勸進今上悲不
自勝讓再讓三僅允監國迨民臣伏闕屢請始以
十五日正位南都從前鳳集河清瑞應非一即告

廟之日紫雲如蓋祝文升霄萬目共瞻欣傳盛事
大江湧出枏梓數十萬章助修宮殿豈非天意也
哉越數日遂命法視師江北刻日西征忽傳我大
將吳三桂借兵貴國破走逆成為我先皇帝后發
喪成禮掃清宮闕撫輯羣黎且罷薙髮之令示不
忘本朝此等舉動振古鑠今凡為大明臣子無不
長跼北向頂禮加額豈但如明諭所云感恩圖報
已乎謹於八月薄治筐篚遣使犒師亟欲請命鴻

裁連兵西討是以王師既發復次江淮乃辱明誨
引春秋大義來相詰責善哉乎推言之然此文為
列國君薨世子應立有賊未討不忍死其君者立
說耳若夫天下共主身殉社稷青宮皇子慘變非
常而猶拘牽不即位之文坐昧大一統之義中原
鼎沸倉卒出師將何以維繫人心號召忠義紫陽
綱目踵事春秋其間特書如莽移漢鼎光武中興
丕廢山陽昭烈踐祚懷愍亡國晉元嗣基徽欽蒙

塵宋高繼統是皆于國讐未剪之日亟正位號綱
目未嘗斥為自立率以正統與之甚至如元宗幸
蜀太子即位靈武議者訾之亦未嘗不許以行權
幸其光復舊物也本朝傳世十六正統相承自治
冠帶之族繼絕存亡仁恩遐被貴國昔在先朝夙
膺封號載在盟府寧不聞乎今痛心本朝之難驅
除亂逆可謂大義復著于春秋矣昔契丹和宋止
歲輸以金繒回紇助唐原不利其土地况貴國篤

念世好兵以義動萬代瞻仰在此一舉若乃乘我
蒙難棄好崇讐規此幅員為德不卒是以義始而
以利終為賊人所竊笑也貴國豈其然往先帝軫
念潢池不忍盡戮勦撫並用貽誤至今今上天縱
英明刻刻以復仇為念廟堂之上和衷體國介冑
之士飲泣枕戈忠義民兵願為國死竊以為天亡
逆闖當不越于斯時矣語曰樹德務滋除惡務盡
今逆成未服天誅謀知捲土西秦方圖報復此不

獨本朝不共戴天之憾抑亦貴國除惡未盡之憂
伏乞堅同讐之誼全始終之德合師進討問罪秦
中共梟逆賊之頭以洩敷天之憤則貴國義問昭
耀千秋本朝圖報惟力是視從此兩國世通盟好
傳之無窮不亦休乎至於牛耳之盟則本朝使臣
久已在道不日抵燕奉盤盂從事矣法北望陵廟
無涕可揮身陷大戮罪應萬死所以不即從先帝
于地下者實為社稷之故傳曰竭股肱之力繼之

以忠貞法處今日鞠躬致命克盡臣節所以報也
惟殿下實昭鑒之多爾袞接書知可法不能屈遂
定議下江南九月

世祖車駕至京師加封多爾袞為叔父攝政王是年冬遣
豫親王多鐸南征江南英親王阿濟格西征逆闖
十二月河南平二年陝西湖廣及江南平又遣貝
勒博洛平浙江福建肅親王豪格平四川於是天
下羣盜皆盡五年十二月大同總兵姜瓖叛六年

二月多爾袞征之會有言喀爾喀將犯邊者乃遣別將討瓊自出張家口擊喀爾喀七年十二月師還至喀喇城薨

世祖率王貝勒大臣等迎其喪於東直門外八年二月蘇克薩哈等首告多爾袞薨時其侍女烏爾庫尼將殉呼近侍羅什博爾惠等告以多爾袞曾製八團龍補黃袍等衣屬令潛置棺內羅什等如言以殮又多爾袞欲於永平圈房率衆移駐與和洛會等

密議已定特以出獵稽遲未行事聞經王大臣等
定議追削王爵並黜宗室乾隆四十三年正月

上諭廷臣曰睿親王首先統衆入闕定國開基厥功最
懋顧以誣告謀逆經諸王定罪除封其時我

世祖章皇帝尚在冲齡未嘗親政也朕每覽

實錄見王之立心行事實能篤忠蓋感

厚恩深明君臣大義為史冊所罕覩乃令王之身後久抱
不白之冤於泉壤心甚憫焉假令當時王之逆跡稍

有左驗削除之罪果出我

世祖聖裁朕亦寧敢復翻成案乃實由宵小奸謀構成寃
獄而王之政績載在

實錄皆有大功而無叛跡又豈可不為之昭雪著加恩復
還睿親王封號追謚曰忠補入

玉牒補繼襲封照親王園寢制度修其塋墓仍令太常寺
春秋致祭並配享

太廟

原奉

諭旨恭
編音門

豫親王多鐸

太祖高皇帝第十五子也初授貝勒天聰二年三月與兄

多爾袞從

太宗往征察哈爾多羅特部大捷

太宗喜語諸貝勒曰兩幼弟初領偏師輒有功宜賜美名
於是號多鐸為額爾克楚瑚爾五年九月

太宗親率軍擊明錦州多鐸從以二百人敗錦州兵七千
於城下又敗明兵於大凌河七年六月

詔問羣臣伐明與朝鮮察哈爾宜何先多鐸言宜伐明直
入長城圖久長之計先其大者則其餘自滅且隨
我所求而自至矣八年七月

太宗親伐明多鐸從同貝勒阿濟格等率兵入龍門會大
軍於宣府遂入邊擊敗明兵畧保安州克之戮其
守將往會

太宗於應州城獻俘八月同多爾袞等畧朔州隨攻大同
敗明兵於城南

太宗以明國必調寧遠錦州兵往山西救援

命多鐸為帥率精兵入明廣寧以遲其救援先遣石廷柱

阿山等趨錦州會錦州總兵祖大壽遣副將劉應

選等率兵來拒過於大凌河西阿山等以兵寡馳

告多鐸疾馳敗劉應選所部兵俘獲無算凱旋獻

俘

太宗迎勞五里外以多鐸初專閫外能出奇取勝嘉獎之
賜良馬五甲五崇德元年四月晉封和碩豫親王兼理禮

部事十二月從

太宗征朝鮮累戰皆有功遂降朝鮮四年八月兼理兵部
事十一月同貝勒豪格畧錦州寧遠斬總兵金國
鳳等五年三月奉

命為左翼總統與濟爾哈朗往修義州城駐師屯田六年
三月代多爾袞圍錦州松山繞錦州城立營浚濠
為久駐計城中惶恐守門蒙古諾木齊武巴什鮑
書約降祖大壽知有異志欲以計擒之諾木齊等

即執兵拒外城蒙古亦執兵助既接戰聲聞關外
多鐸與濟爾哈朗至城下援之關內蒙古絕援兵
入與明兵戰於城上明兵敗大兵遂入關徙其民
義州捷奏至

太宗大悅四月復敗明杏山松山援兵八月明經畧洪承
疇以八總兵十三萬衆來援錦州

太宗親統大軍往征之疾馳六日環松山而營明兵宵遁
遣貝子博洛等追擊之並簡精兵付多鐸令設伏

遂夾擊總兵吳三桂等兵敗之尋又奉

命圍松山城內夜出兵來犯擊敗之斬首千餘級十二月
承疇自松山率兵夜出來犯多鐸令沿濠射之悉
敗去城中益困七年二月松山副將夏承德密遣
約降為內應以其子舒出質夜半諸將士舉梯登
城城遂克生擒承疇及巡撫邱民仰等七月敘功
晉封多羅豫郡王八年四月疏言當今之勢宜暫
息兵以農務為急衣食豐足舉國慶豫再有舉行

未晚也順治元年四月從多爾袞入關破流賊定
燕京十月晉封和碩豫親王時明福王朱由崧自
立於南京稱大號遣兵扼淮徐為割據計而李自
成尚據陝右多鐸奉

命為定國大將軍率師南征二年由河南進兵克陝州趨
潼關凡三敗李自成之衆斬獲無算賊守將皆望
風降附復戰於潼關大軍奮勇衝擊呼聲動天地
縱橫掩殺漫山彌野自成精銳畧盡適至西安不

復能成軍拒守多鐸師渡潼關濠口斬偽將馬世堯師至西安自成奔商州南走湖廣追之不及二月捷聞

世祖以流寇既竄西安平定關中撫綏事宜付英親王阿濟格等

命多鐸率大軍由河南趨淮揚討江南之稱號自立者四月渡淮趨揚州招諭守揚閣部史可法等降不從攻克其城獲可法等斬之五月師至南京文武官

數百員馬步兵二十三萬有奇皆迎降南京平追擒福王于蕪湖捷聞

世祖嘉悅遣侍臣赴軍中慰勞馬多鐸復遣兵敗馬士英之衆降潞王朱常淦江浙悉定七月

詔以貝勒勒克德渾為平南大將軍代多鐸還十月凱旋世祖御殿以多鐸統軍以來功最大晉封和碩德豫親王賜黑狐帽貂朝衣及玲瓏鞍馬金五千兩銀五萬兩三年五月蘇尼特部騰吉思等叛奔喀爾喀

詔以多鐸為揚威大將軍往征七月多鐸等至營噶爾察
克山聞騰吉思在衮噶魯台星夜疾進三日追及
於額克特山獲其妻子及牲畜喀爾喀土謝圖汗
以兵二萬邀大軍於扎濟布喇克之地多鐸擊敗
之追逐三十餘里次日碩雷汗復率兵三萬至又
擊敗之追逐二十餘里十月凱旋

世祖出安定門迎勞四年七月

御太和殿冊封為輔政叔德豫親王

賜金千兩銀萬兩鞍馬二冊大稱定鼎中原以來所建功
勲卓越等倫云六年三月薨七年三月

命立碑紀功九年三月鄭親王濟爾哈朗等會議多鐸係
多爾袞同母弟應削王爵

世祖念其勲勞止追降郡王康熙十年五月追謚曰通乾
隆四十三年

上諭廷臣曰豫親王從睿親王入關肅清京輦即率師
西平流寇南定江浙實為開國諸王戰功之最乃以

睿親王誣獄株連降其親王之爵後又改封信郡王
以王之勲績超邁等倫自應世祚原封以彰殊眷著
仍追復親王還號為豫一體配享

太廟多鐸子多尼征故明桂王朱由榔於雲南敗李定國
白文選之衆所向克捷襲封郡王順治十八年薨
謚宣和

肅親王豪格

太宗大皇帝第一子也生而英毅多智畧從征蒙古諸部

功最著授貝勒天命十一年四月隨大貝勒代善
征蒙古五部有功天聰元年五月

太宗伐明豪格往衛塔山糧運遇明兵二萬以八十人擊
敗之三年十一月大軍進逼北京大貝勒莽古爾
泰率諸貝勒大臣迎擊明督師袁崇煥錦州總兵
祖大壽援兵于廣渠門外敵以重兵設伏于右莽
古爾泰令諸貝勒擊其右豪格如命衝敵右敗其
伏餘貝勒由中路乘之敵遂潰四年正月與岳託

還守瀋陽五年七月

太宗西征

命與貝勒杜度等居守六年五月

太宗征察哈爾遂伐明豪格從同濟爾哈朗畧歸化城等處有功六月晉封和碩貝勒七年六月

詔問用兵宜何先豪格言錦州寧遠攻之無益宜用更番法分兵兩路一從寧遠入一從舊路入夾攻山海關不然進攻通州久駐其地往偵流賊情形彼方

分師捍禦我伺其懈擊之事可圖也

命與阿巴泰等畧明山海關有功八年七月伐明分兵四路入

太宗親統大軍由宣府趨朔州豪格率揚古利毀邊牆入大軍遂由上方堡分道進旋同貝勒多爾袞畧朔州及五臺山而還復從攻大同擊明援兵走之九年二月

命與多爾袞岳託薩哈璘為元帥統兵一萬往收察哈爾

師至錫喇珠爾格遇察哈爾汗妃及台吉索諾木等以千五百戶降遂抵託哩圖託哩圖者額哲所駐地也會天大霧乘其無備遣額哲母蘇泰太后之弟南楮等先往見額哲母諭以奉

旨招撫意額哲母命額哲率衆迎諸貝勒入遂定盟次日率所部降額哲以古玉璽獻文曰制命之寶元順帝奔應昌時所失後林丹汗得之者也師還畧明山西邊郡敗其兵崇德元年四月晉封和碩肅親

王兼攝戶部尋坐黨岳託降爵解部任二年正月
從征朝鮮敗安州黃州兵於寧邊城下復敗安州
帥於陶山三年十月伐明畧地至曹州復敗明兵
於滹沱河所至克捷以功復原封五年六月同多
爾袞等屯田義州六年三月同多爾袞圍錦州以
多爾袞輕違

詔旨豪格亦坐罪降郡王八月

太宗聞洪承疇兵來援親統大軍自

盛京疾馳抵松山遣大學士剛林諭二王先駐高橋
二王馳奏奉

旨屯高橋倘敵兵為我所迫錦州松山兵內外夾攻協力
死戰而欲自高橋來援勢難速至不如請大軍暫
駐松杏之間

太宗可其奏尋同多爾袞還守

盛京十月復

命從圍松山七年二月松山副將夏承德密遣人請降

太宗許之用為內應時豪格同貝勒等率兩翼兵梯城南
先登遂克松山擒承疇等四月同濟爾哈朗攻塔
山克之七月敘功復原封順治元年以語侵多爾
袞為人訐告坐言詞悖妄削爵

世祖既定鼎燕京大封諸王念豪格從定中原有功仍復
原封是年冬山東土寇竊發奉

命往征遂定濟寧破滿家洞賊渠土寇悉平二年正月
命阿巴泰代豪格還三年正月

命為靖遠大將軍西征斬流寇石二等盡復所陷州縣陝
西平十一月整兵入蜀至南部偵知賊首張獻忠
據西充縣隨大兵進抵西充獻忠來拒麾兵奮
擊射殪獻忠于陣復分兵搜勦餘賊盡擒偽王以
下文武官四年復勦餘賊破賊營一百三十餘處
蜀寇悉平五年二月凱旋

世祖御太和殿宴勞之尋為多爾袞所構陷下獄卒七年
世祖親政念其枉復封和碩肅親王立碑表之十三年追

謚武乾隆四十三年

上諭廷臣曰以肅親王後襲封改號曰顯著仍復原稱
封號並配享

太廟

原封成親王追封克勤郡王岳託

太祖高皇帝孫禮親王代善第一子也有謀勇授台吉天
命六年二月大兵畧明奉集堡將旋有廝養卒指
言明兵所在岳託同諸台吉追擊之摩其壘而還

三月攻明瀋陽城我師追敗明總兵李秉誠等援
兵于白塔鋪岳託會兵同逐北四十里十一年八
月

太祖高皇帝上賓岳託與弟薩哈璘以

太宗文皇帝有聖德密議推戴告其父代善曰國不可一
日無君邦家大事宜早定策

四貝勒才德冠世深契

先帝聖心衆皆悅服當速繼大位代善曰此吾夙心也遂

夜作議書翼日以書徧示諸貝勒大臣于朝遂定議奉

太宗嗣位十月同弟薩哈璘貝勒豪格隨父代善征蒙古五部有功是歲封貝勒天聰元年正月率兵征朝鮮攻義州定州漢山三城克之渡嘉山江克安州至平壤朝鮮王李倧遣其臣進昌君求和阿敏有異志不允岳託知不可止策馬還營與濟爾哈朗密議駐師平山許之和阿敏以未與議縱兵大掠

復令朝鮮王弟李覺與阿敏盟乃旋五月從

太宗伐明圍寧遠有功二年五月率兵畧明邊墮錦州杏
山高橋三城毀十三站以東墩臺二十一處乃引
還三年九月同諸貝勒畧明錦州寧遠境焚其積
聚十月

太宗伐明師次喀喇沁之青城代善莽古爾泰見

上請班師退

太宗意不懌岳託同諸貝勒見告之故因力贊進兵至午

夜議定遂同濟爾哈朗攻大安口毀水門入乘夜
敗馬蘭營援兵于城下比明遵化援兵來營于山
之林木間顧謂濟爾哈朗曰吾當獨往取之遂馳
擊大破之五戰皆捷馬蘭營馬蘭口大安營三城
皆相繼降四年正月與豪格還守瀋陽五年七月
攻明大凌河

太宗親統大軍自白土場趨廣寧岳託率兵二萬別由義
州進八月會大軍于大凌河圍其城祖大壽請降

以子可法質見諸貝勒時岳託反覆開導之揖可
法乘馬去大壽遂以其城降翼日

命同諸貝勒統兵四千偽作漢裝偕大壽作潰奔狀夜襲
錦州會大霧乃止是夜錦州聞礮聲謂大凌河守
兵潰圍出分路來迎遇我師敗之是年初設六部
命攝兵部事六年正月岳託疏請漢人之歸順者宜各予
以室家之樂善為撫養毋致一夫失所以廣招徠
庶人心景附大業可成

太宗嘉納之七年二月

詔問用兵復疏言時不可失事宜勇斷山海關通州燕京
當先圖其一以立基是月攻旅順口克之師還

賜宴於郊

太宗親酌金卮賜之酒崇德元年正月晉封和碩成親王
旋以徇庇莽古爾泰碩託且欲離間濟爾哈朗豪
格論死

太宗特寬之降多羅貝勒罷兵部任二年復以驕蹇論罪

再蒙

恩寬宥三年十一月

命為揚威大將軍貝勒杜度副之統右翼兵與左翼奉命
大將軍睿親王多爾袞分道伐明岳託兵至牆子
嶺毀邊牆入密雲總督吳阿衡以兵六千入保牆
子嶺堡外立三寨為犄角我師攻其寨拔之復連
敗明兵獲敵卒知堡堅且有重兵不易拔嶺東西
高處有間道可越于是分兵兩路攻其前以牽敵

師潛以兩路從間道入克臺十有一處所向皆捷
尋以疾薨于軍四年三月多爾袞捷奏至

太宗覽奏無岳託名驚問知病卒慟哭久之令且勿使禮
親王知為輟飲食者三日四月喪還

駕至沙嶺設幄遙奠

還御崇政殿

命王以下及諸大臣往奠

詔封為多羅克勤郡王

賜馬五駝二銀二萬兩予羅洛輝襲封貝勒康熙二十七

年

聖祖為立碑以紀其功乾隆八年十九年四十三年四十

八年

上詣

盛京俱酌其墓又四十三年正月

上諭廷臣曰克勤郡王後改稱平郡王著一體復還原

稱封號並配享

太廟

穎親王薩哈璘

太祖高皇帝孫穎親王代善第三子也天資聰敏通滿漢

蒙古文義屢從征伐所向有功天命十一年封貝

勒八月

太祖高皇帝上賓薩哈璘與兄岳託密議擁戴

太宗告其父大貝勒代善遂定議十月隨父代善北征喀

爾喀扎嚕特部斬獲甚衆天聰元年五月

太宗親伐明與兄岳託貝勒豪格率精騎為先鋒大兵進
圍寧遠敗明總兵滿桂兵追至城下諸貝勒繼至
分兵勦殺敵衆是役也薩哈璘被創戰彌厲三年
十月大軍次喀喇沁之青城代善等密議班師

太宗不懌薩哈璘與兄岳託及諸貝勒進見勸決計進取
十一月從

太宗伐明逼北京同諸貝勒擊敗明袁崇煥祖大壽援兵
又南畧通州焚其船克張家灣還攻克香河縣敗

敵三河進克永平府五年七月初設六部

命理禮部事是月

太宗親率大軍伐明與貝勒杜度豪格留守七年六月

詔問用兵何先薩哈璘言當寬朝鮮拒察哈爾而專征明

并陳方畧是年八月同貝勒阿巴泰往畧明山海

關八年二月同貝勒多爾袞往迎明降將尚可喜

攻廣鹿長山二島俘獲不可勝計六月隨父代善

畧明山西邊進兵大同敗代州兵九年二月同貝

勒多爾袞岳託豪格等統兵往收察哈爾途遇察
哈爾汗妃及台吉等率其屬來降遂盡收額哲全
部還師畧明山西邊地諸州縣皆降附縱兵出入
無敢當者凱旋

太宗親率諸貝勒大臣往迎之先是諸貝勒大臣以遠人
歸附國勢日隆合詞請

太宗進稱尊號

太宗却之至是復請

太宗仍不允薩哈璘乃令內院大臣希福等奏曰臣等屢
次陳請未蒙

皇上俞允夙夜悚惶罔知所措伏思

皇上不受尊號其咎實在諸貝勒不能殫竭忠誠為久大
之圖徒勸

上早正大號是以

皇上不肯輕受今諸貝勒誓圖改行竭忠輔國

皇上宜受尊號

太宗善之曰貝勒薩哈璘為朕深謀欲善承

皇考開創之基開陳及此實獲我心爾身任禮部當主之
諸貝勒果誓圖改行尊號之受與不受朕當再思
翼日薩哈璘集諸貝勒於朝各書誓詞以奏

太宗以內外諸貝勒勸進之誠難以固讓而朝鮮通好之
國應與共議因

命使往朝鮮薩哈璘乃與諸貝勒遣人偕使臣同往告以
內外勸進之誠并陳示各國來附兵力強盛之實

崇德元年正月有疾

太宗臨視再三四月議功擬封多羅郡王五月薨薩哈璘

明達政體通知古今掌故禮部典文制度多所裁酌

太宗深嘉之及薨

太宗悲悼不已輟朝三日祭時慟哭三奠追封和碩穎親

王六月

太宗在翔鳳閣夢人請曰穎親王乞賜牛一如是者再寤

以問內院大臣希福等皆未知所謂後閱會典凡親王薨初祭例賜一牛始大異之以

聞

太宗即命禮部致祭

賜以太牢康熙十年追謚曰毅

敬謹親王尼堪

太祖高皇帝孫廣畧貝勒褚英第三子也從征屢有功天聰九年五月大兵伐明入山西邊境隨貝勒多鐸

率偏師入寧錦界以牽明兵之援山西者尋封固
山貝子崇德元年十二月隨豫親王多鐸征朝鮮
其王棄國遁追至南漢山城圍之復屢敗其援兵
朝鮮遂服師還

命議政四年三月伐明率四旂兵環守塔山連山七年九
月克錦州以尼堪代博和託等駐防順治元年四
月隨睿親王多爾袞破流賊於山海關尋復破賊
於慶都縣十月晉封多羅貝勒十二月隨多鐸南

征三敗流賊李自成於潼關二年正月大破賊將
劉方亮之衆三月分兵趨歸德定河南四月進征
江南五月克南京明福王朱由崧遁太平復走蕪
湖將以舟渡江尼堪追之截江口敗黃得功於江
上得功中流矢死盡奪其舟偽總兵田雄等縛其
王由崧以降又攻江陰克之初大兵渡江

世祖馳賜尼堪良弓一至是凱旋

賜金銀鞍馬三年正月隨肅親王豪格西征分兵破流賊

賀珍於漢中入蜀滅流賊張獻忠四年八月分兵
與貝子滿達海等進勦遵義夔州等處斬偽王以
下千餘員俘獲無算川寇悉平五年九月晉封多
羅敬謹郡王六年正月

命為定西大將軍討大同叛鎮姜瓖屢破賊衆斬偽巡撫
姜輝等三月晉封和碩敬謹親王四月由左衛往
圍大同賊勢窘偽總兵楊振威等斬瓖並其兄琳
弟有光以其首來降遂入城安撫其民振旅還八

年張獻忠餘孽侵擾湖南九年七月

命尼堪為定遠大將軍統兵征湖南貴州

世祖親送至南苑尋聞賊已入廣西陷桂林八月

勅尼堪毋往貴州仍從湖南取寶慶十一月抵湘潭賊首

馬進忠等遁遂進師衡州去衡山縣三十里前鋒

遇賊哨卒敗之即於其夜兼程進未明抵衡州大

兵方列陣賊衆四萬餘猝至尼堪麾首隊進擊大

破之追北二十餘里方首隊兵擊賊時林內賊伏

發城內賊復出應之師欲退尼堪曰我兵擊賊無
退者我為宗室不斬除逆寇何面目歸乎遂奮勇
直入賊環之數重尼堪率諸將士縱橫衝擊矢盡
拔刀力戰沒於陣十年十月喪還京

世祖命親王以下郊迎卹典優厚謚曰莊

謙郡王瓦克達代善第四子也天聰元年五月隨
太宗伐明軍至寧遠總兵滿桂率衆拒大敗之追至寧遠
城下殲其卒時瓦克達以力戰被創崇德五年十

二月從多爾袞攻錦州見兵有出樵者即率十餘人擊斬之七年大軍三圍錦州列巨礮城北明經畧洪承疇率騎兵來奪力戰却之會天雨敵復來戰又敗之復進擊承疇三營步兵時軍將費雅思哈失馬與之累騎而出喀寧阿墮馬創甚敵兵圍之數重復直入其陣挈之以歸順治元年四月從多爾袞入山海關定燕京旋破流賊李自成又追奔至慶都縣敗之二年流賊自西安南走荆襄隨

阿濟格率師往勦比至賊衆千餘方乘船揚帆遁
同鰲拜巴圖魯提精卒登岸叢射之賊被射及溺
水死者不可勝計悉取其船以濟大軍敘功封三
等鎮國將軍三年五月以蘇尼特部騰吉思等叛
奔喀爾喀從多鐸往討降其族又擊土謝圖汗碩
雷汗兵俱敗之四年三月晉封鎮國公五年十一
月戍守大同甫至適總兵姜瓖叛陷朔州寧武等
處滿達海率兵往討瓦克達從六年復朔州等處

是年冬滿達海回京以瓦克達為征西大將軍七年二月平潞安平陽澤州降其衆先是明大學士李建泰已納款至是復與姜瓖合據太平縣我師至圍其城別遣游騎斷其餉道越二十餘日詣軍門降瓦克達英勇素著所至皆不戰自潰且馭軍整肅剿撫兼施由是平陽所屬州縣悉定八年二月晉封多羅謙郡王三月

命理工部事九年八月薨初山西遭姜瓖之亂瓦克達駐

平陽戢軍安民平陽民德之薨後建祠致祭榜曰
多羅王廟康熙十年五月追謚襄

衍禧郡王羅洛渾

太祖高皇帝曾孫岳託第二子也崇德四年九月襲封多
羅貝勒五年五月有蒙古多羅特部蘇班岱阿巴
爾岱初降于明至是密來約降奉


命同鄭親王濟爾哈朗率師往徙之夜過錦州至杏山令
蘇班岱阿巴爾岱各挈其孥與其牲畜以行比明

錦州松山杏山合兵七千來截我師于杏山城外
我師佯退數里敵譟而前反兵縱擊羅洛渾同濟
爾哈朗皆親自搏戰大破之追殺至城下復分兵
攻其城西二營拔之師還

賜御廐馬一九月同濟爾哈朗督師圍錦州代多爾袞豪
格還六年三月親率右翼兵設伏敗明援兵于南
山西岡六月多爾袞豪格來更代將受代合兵擊
敗明山海關援兵追及松山城而還八月從

太宗親征明克松山有功順治元年十月以從定燕京破
流寇有功晉封衍禧郡王三年正月同豪格平蜀
尋卒

賜卹如禮謚曰介



欽定盛京通志卷六十六